

Naalakkersuisunut apeqqut:

Boligstøtte aqqutigalugu illut illuutigineqalersimasut nutarteriffigineqarnissaannut periarfissat suuppat aamma qanoq atorineqarsinnaappat?

(Inatsisartunut ilaasortaq Loretha Henriksen, Kattusseqatigiit Partiiat)

Akissuteqaat

(Ineqarnermut, Attaveqarnermut Angallannernullu Naalakkersuisoq)

Aallarniutigalugu Inatsisartuni ilaasortaq Loretha Henriksen, Kattusseqatigiit Partiiat, apeqqutaa pillugu qutsavigaara, suliassaqarfik taanna pillugu nassuiaanissamut periarfissimmanga. Boligstøttemit taarsigassarsilluni illuliani iluarsaassinissamut tapiisarnermut taarsigassarsititsisarnermulluunniit maleruagassat inissialiornermut, illunut ataatsimoorussanut, illuliassanut il.il. tapersiissuteqartarneq pillugu Inatsisartut peqqussutaanni nr. 11-mi, 19. november 2007-imeersumi paragraffini 27-mi aamma 46-mi allassimapput.

Naalakkersuisut inunnut, ukiuni akileraaruteqarfiusuni kingullerni marlunni inoqutigiinni akileraaruteqaataasussanik 180.000 koruuninik taakkuluunniit sinerlugit isertitaqarsimasunut, imaluunniit inunnut, piffissaq manna tikillugu isertitai apeqqutaatinnagit siunissami qaninnermi ukiumi akileraaruteqarfiusussami inoqutigiinni akileraaruteqaataasussanik 180.000 koruuninik taakkuluunniit sinnerlugit isertitaqartussatut naatsorsuutigineqartunut taarsigassarsititsisinnaapput.

Aammattaq allassimavoq, taarsigassarsinissamik qinnuteqaatinik nalilersuinermi Naalakkersuisut pingaartumik qinnuteqartup pigisai nalillit aammalu inuussutissarsiornermi piginnaanerisassaataut naatsorsuutigineqartut, kiisalu illup pisoqaassusaa niuernikkullu nalinga eqqarsaatigisassagaat. Tamatuma saniatigut Naalakkersuisut inissiap atortulersugaanera, inissiap ataatsimut isigalugu qanoq issusia aammalu sumiiffimmi inissianik pilersuinermi pissutsit eqqarsaatigisassagaat allassimavoq. Inissianik, Namminersorlutik Oqartussanit taarsigassarsititsivigineqarsimasunik alliliinissamut pitsanngorsaaniissamulluunniit taarsigassarsinissamut qinnuteqaatit nalilersorneqarnerini aamma qinnuteqartup akiitsuisa sinneri, kiisalu qinnuteqartup maannakkullu akiliisinnaassusia akileerusussusialu Naalakkersuisunit eqqarsaatigineqartassapput. Taarsigassarsisoq taarsigassarsianik akilersuisinnaassuseqartoq naliliiffigineqarpat, aatsaat Naalakkersuisut taarsigassarsititsisinnaapput.

Naalakkersuisut inunnut, ukiuni akileraaruteqarfiusuni kingullerni marlunni inoqutigiinni akileraaruteqaataasussanik 180.000 koruunit inorlugit isertitaqarsimasunut, imaluunniit inunnut, piffissaq manna tikillugu isertitai apeqqutaatinnagit siunissami qaninnermi ukiumi akileraaruteqarfiusussami inoqutigiinni akileraaruteqaataasussanik 180.000 koruunit inorlugit isertitaqartussatut naatsorsuutigineqartunut annerpaamik 100.000 koruunit tikillugit tapiissuteqarsinnaapput. Inissiami Namminersorlutik Oqartussanit ingerlasunik taarsigassarsititsisoqarsimappat, imaluunniit maannakkut piginnittuusut siornatigut

Namminersorlutik Oqartussanit taarsigassarsiaqarsimappata aatsaat Naalackersuisut tapiissuteqarsinnaapput.

Inatsisartut aningaasanut inatsisaannit suliassaqarfimmut aningaasaliissutit peqqissaarutamik nalilersuisoqareerneratigut tulleriiaarisoqareerneratigullu tunniunneqartarput. Illuni pioreersuni iluarsaassinissamut pitsanngorsaanissamullu taarsigassarsiarititassat tulleriiaarneqarnerini illut piginnittuisa ingerlaannarnerat, pitsaassutsimik pitsannguinnissamut taarsigassarsititsisoqarnissaa, soorlu kiassaateqarfimmut atassusiisoqarnissaa, ukioq kaajallallugu imermut atassusiisoqarnissaa, kuuffeqarfimmut atassusiisoqarnissaa, uffartarfiliisoqarnissaa, oqorsaaqqittoqarnissaa il.il. pingaarnerutinneqartarput. Inissiaatit pitsaassutsimikkut pitsanngorsarneqarnissaat siunertaralugu boligstøttemit taarsigassarsilluni illulianik iluarsaassisoqartarpoq. Taamaattumik suliassanut ingerlaavartumik aserfallatsaaliinertut aammalu boligstøttemit taarsigassarsilluni illulianik piginnittut namminneerlutik akiligassaattut isigineqarsinnaasunut tapiisoqarneq ajorpoq taarsigassarsititsisoqartaraniluunniit.

Naggasiutigalugu ilisimatitsissutigisinnavaara, 2011-mut aningaasanut inatsisissatut siunnersuummi boligstøttemit taarsigassarsilluni illuliat aserfallatsaalineqarnissaannut aningaasanik salliutitsisoqanngimmat.